


**A** *rubá***A** *ntaño*

Esaki ta e prome misa di Aruba traha na Noord, y e motivo pa a traha esaki tabata, cu e hendenan poco poco a cuminsa aleha for di Alto Vista y muda pa un parti mas pabao. E ora ey Alto Vista tabata keda mucho leu pa nan, manera ta conoci Alto Vista ta keda basta na canto di laman. Despues a bin constata cu esaki tabata e causa di un "keintura preto", cu a afecta hopi hende y causa nan morto. **Ademas mas y mas tanto hende di Corsow a bini Aruba pa traha un cunucu manera tanki Flip, Bubali, Washington.** Por ta cu e famianan Semeleer, Christiaans, Gaide, Henriquez den e tempo ey a bai biba aya nan. Dia cu pader Christobal de Quesada a bishita Aruba na anja 1778, el a haya dos misa aki nan. Misa di Reina Santisimo Rosario na Alto Vista y misa di Sta. Anna na Noord. Na 1772 Noord no tabatin misa ainda, anto den e anjanan 1772-1778 nan a traha e misa di Sta. Anna. Degun tradicion, Bernardo Silvester, hunto cu Henrique Alvarez, ruman di Miguel Alvarez, y Caspar Silvester ruman di Bernadino, a percura pa Noord haya su misa. Como cu na 1778 e misa tin su patrona Sta. Anna, ta di supone cu cualkier sacerdote Spanjo, cu a bishita, a duna e nomber y a bendiciona e misa. Quizas esey tabata pader Joaquin de BBorras, kende tabata na Aruba di dia 21 te cu dia 24 di februari 1776. Su nomber ta keda menta den e archivo di Noord hunto cu nomber di otro sacerdotenan der e anjanan ey. Di e pader de Borras tin skirbi, cu ta "solemnemente" e ta bautiza hende. Santa Anna tabata e patrona stima cerca e spanjonan. Especialmentp e navegantenan tabata stima Santa Anna como patrona di bon bientu. Asina anto nos por comprende, cu e spanjonan, kendenan tabata cruza laman bastante e tempo aya, a prefera Santa Anna como patrona di nan misanan y terranan leu.

Misa di Santa Anna tambe a worde yama Misa di Monte Calvario. E segun e historiador Johan Hartog ta pasobra esaki ta construi na pia di un cero cu ta Boegoeroei. E prome misa di Santa Anna na Noord tabata un misa di barra cu klei. Mgr. Niewindt a yega di yamele "un miserable choza". Na 1831 pastoor van Lommel a cambia e misa bieu den un misa di piedra cu dak di pal'i maishi.. Pastoor van Lommel a cosntrui e misa aki cu su mes fondo. E misa tabata mas o menos na e mesun lugar cu e ta actualmentena Noord. Na 1881 pastoor Bongers a mostra su obispo, Mgr. v. Ewijk, cu Noord tabatin mester di un misa nobo. "Masha bon", mgr. a bisa, pidi bo parokianonan pa yuda. , pero e parokianonan no tabatin gana pa traha un misa nobo. Den e tempo di awendia nos ta mira cu esaki a cambia, ya cu parokianonan di Noord ta contribuyendo den tur forma pa cualkier trabao cu tin di ser haci pa cu e misa di Santa Anna. Ultimamente nos por a mire haya un flux nobo, geel manera pampoe-na, pro talvez esaki tin que ver cu e color di e bandera papal. Hasta pa ilumina den oranan di anochi e tin dos lampi cendi henter anochi. A bini acerca un centro di recreo unda practicamente tur anochi tin actividad deportivo, di cual mas tanto ta volleyball. E school cerca di e misa casi tur siman tin actividad cu bon asistencia di e parokianonan di Noord. Y asina nos por bisa cu e pueblo di Noord ta uno cu mas tanto tabata en contacto cu e spanjonan den for di e tempo di descubrimiento dor di Alonso de Ojeda. Un capitan den e flota di Cristobal Colon, y cu un tempo e spanjonan a considera nos isla di poco valor. Alonso de Ojeda na su cama di morto a pidi pa nan dere na e entrada di e Capilla pa ora cu e hendenan bai misa nan por trapa riba dje, ya cu na bida ningun tabata risca na trapa ni su punt'i zapato.